

Nerman Kovačević: Naš cilj je Premijer liga, pozivam publiku da nas podrži protiv Bosne!

Za odbojkašice Slobode okončana je takmičarska sezona, dok za njihove kolege, odbojkaše Slobode, počinje najzanimljiviji i najvažniji dio – doigravanje za prvaka Superlige FBiH i ulazak u Premijer ligu.

Sutra se u Mejdanu igra prva utakmica polufinala play-offa sa sarajevskom Bosnom, prvakom grupe Jug Superlige FBiH.

Jedan od najiskusnijih i najboljih igrača tuzlanskih "crveno-crnih", Nerman Kovačević, kaže da njegova ekipa, koju predvodi trener Armin Dervišević, u sutrašnju utakmicu ulazi sa željom da pobijedi Sarajlije.

– Naš cilj je Premijer liga i nadam se da ćemo odigrati dobru utakmicu. Naša snaga je kolektivna igra ekipe što bi trebalo biti od presudnog značaja za ovaj meč. Mi smo mlada ekipa dok su naši protivnici većinom iskusniji igrači, pa stoga trebamo biti posebno oprezni – napominje Kovačević.

No, u Mejdanu nikome neće biti lako, pogotovo ako se popune tribine male dvorane. Publika bi mogla Tuzlacima dati vjetar u leđa na putu ka pobjedi u prvoj utakmici pla-offa.

-Važno je da što bolje i motivirano uđemo u meč, a u tome će nam pomoći publika. Posebno je lijepo igrati u Mejdanu, jer navijači znaju prepoznati zalaganje i trud. Ovom prilikom pozivam sve ljubitelje sporta da nas podrže na putu ka eliti bh. odbojke – poručio je Kovačević, borac bez mane i straha.

Utakmica Sloboda – Bosna igra se u u nedjelju od 18 sati.

Ulaz na utakmicu je besplatan, saopćili su iz OK Slobode. (tl, mp)

Date: 24-03-2018